

Chumukedima Block kübok ASHA tem atema training agütsü



Dimapur, Aenjeti/January 29 (TYO): Chumukedima Block kübok Accredited Social Health Activists (ASHAs) pur batch ana lemsar mental health, mental illness, Intellectual Disability aser Epilepsy nung ananü training agüja liasü. Iba training ya Prodigals' Home kübok Community Mental Health Programme (CMHP) ajanga January 28 & 29, 2021 anogotem par office nung agüja liasü.

Iba training nung shisalen sayur, Sani, CMHP field coordinator aser Sukum Aier, Asst. Field coordinator nati World Health Organization

Fazl Ali College nung IPR workshop agi

Dimapur, Aenjeti/January 29 (TYO): Fazl Ali College, Mokokchung nung January 28 aser 29, 2021 anogotem nung Online/Offline ajanga Intellectual Property Rights indang workshop agia liasü.

Iba workshop ya Patent Information Centre, Nagaland State Science and Technology Council, Department of Science and Technology, Government of Nagaland den lungjemer ayongzüka agi.

CSIR-NEIST, Jorhat aser Patent Information Centre,

Assam Science and Technology & Environmental Council den Patent Information Centre, Nagaland Science and Technology Council nungi shisalen sayurtemi Intellectual Property Rights omen kübok onük balala nung tatsü-talang jembia liasü.

Iba workshop tenzükba sentong nung Prof. Dr. Sibnath Deb, Director, Rajiv Gandhi National Institute of Youth Development (RGNIYD) Sriperumbudur, Tamil Naidu ya



Nagaland Chief Secretary, asür Wb. Temjen Toy IAS nem akhüm aser tetushi agüja Ao Senden-i anir Watsü Mungdang aser Ao Kaketshir Mungdang (AKM) lenirtem Aor Kilem nung adenshia sarasadem sentong ka ayongzüka akaba mapang tangokba noksa nung angur. Asür Temjen Toy ama nübu tajung alima nungi anojungi pilaba asoshi tesasaba o den asüri toktsür aoba kinungtsü den jala jabaso aser kinungertem den asükhu lemsatepba otem iba sentong nung adenertemi lemsatep. Ao Senden ayonga Ao kin rangben par kibong den taku marok ajemba tamaitü 29th January, 2021 nü Ao litsü ajak nung Government/Private office aser school-tem, shishilembadak tesem ajak shibanger mang yima liasü. Mokokchung, Jan 29, 2021.

illness tabu balala agi timtemer den inyaker aser parnok nem diagnosis, medication, psycho education amala agütsür aser ano parnok ki semdanga anepalua senzür.

Iba Project Team den Guwahati nungi Consultant Psychiatrist aser CIHSR, Dimapur nungi Clinical Psychologist külemi inyaker.

CMHP ya Azim Premji Philanthropic Initiatives, Bangalore ajanga tentet aser technical tsütsü Ashadeep, Guwahati ajanga yarir aser tang Chumukedima Block kübok yimtsüng aser ward balala nung teyari agütsür.

tongti tesemdanger liasü aser Prof. Vasanthi Rajendran, Registrar, RGNIYD sentong shibangtsür liasü.

Iba sentong nung online ajanga nisung 140 shi shilem agi aser offline nung nisung 60 shi shilem agia liasü.

North-East India nung lanurtem ajungkettsü atema sentong temeja ka ama iba workshop ya Rajiv Gandhi National Institute of Youth Development (RGNIYD) Sriperumbudur, Tamil Naidu ya ajanga sponsor süa liasü.

Lokti tentet balalai Asür Temjen Toy den asükhu lemsatep

Dimapur, Aenjeti/January 29 (TYO): Asür T. Temjen Toy tia makai asüba ajanga mangyim tejashi anogo nung Ao Legislator temi asür kinungtsü Rouvi aser tanurtem den asükhu lemsateper, ta Ao Legislator tem tenüng nung Sharingain Longkumer, Speaker, NLA, Metsubo Jamir, Minister RD aser Imkong L Imchen MLA nungeri sangdong ka ajanga ashi.

Asür Temjen Toy ya meranga inyakba, tenendak aser mera taket ketdangtsür ka liasü, shibai Nagaland nung aliba aser talisa Mokokchung nung aliba nüburtem nem konang tetushi bener arutsü. Pa küm 32 tashi sorkar tenzükba wadang nung inyaka arudang pai Nagaland nung aliba nüburtem bendanga agütsür tenzükba yimyattem ajitetogo, ta sangdong ajanga ashi.

Pa asüba ajanga tawa adokdaksüba asenoki kanga jangja metettsü. Pai tatishitsü tajung keta mapa inyakba aser lokti nung shilem agiba ajanga asen kin sanger sorkar tali lungjemshidaksü aser Naga kin ajunga den tesendaktep tashi itshidaksü. Tulusang Tsüngremi mangyimer kibong nem tashi agüjang aser pa tanüla tatem maka tesunep nung anisüngzükjang ta sarasademtsür, ta sangdong ajanga ashi.

January 28, 2021 nü Temjen Toy IAS, Chief Secretary, Government of Nagaland asüba asoshi temolung khurema jashir, ta Ao Senso Telongjem Dimapur sangdong ka ajanga ashi.

Lenir tajung ka ama aser sorkar tenzükba ka ama asür Temjen Toy-i state nung nüburtem nem mapa tajung jenti inyaktsüogoo. Pa ya sentilong ka ama liasü, shibai ochi tangatetba nung nübur tenzükba ajanga nüburtemi pa sakloka liasü. Pa ama nübu tajung mela mela amadoktsü makok aser pa mapatem ozü molungjang nung teti alitsü. Dimapur nung aliba Ao kin tenüng nung ASTD ajanga asür Temjen Toy mangyim jashi lemsateper aser mangyimer kibong nem tesunep agüjang ta

NPF, Mokokchung Division-i asür Temjen Toy IAS mang ayimer

Dimapur, Aenjeti/January 29 (TYO): Temjen Toy IAS, Chief Secretary, Nagaland anojungi akümüli wadang tembangadokba osang angashia Naga People's Front, Mokokchung Division aoksar aser molungzürepa jashir, ta NPF Mokokchung Division tir Moasangba Jamir aser tongti zülur (Admin) Tangit Imsong nati sangdong ka ajanga metetdaksü.

"Pa asüba ya Naga nunger, State Sorkar aser lokti atema takoksa ulura, koba pai pa arishi tepiyong tajungtiba agi nendaka

sarasademtsür, ta ASTD sangdong ajanga ashi.

Temjen Toy IAS, Chief Secretary, Nagaland anojungi asüba asoshi Dimapur Ao Lanur Telongjem aoksar aser kanga sasar, ta sangdong ka ajanga ashi.

Nagaland nung temolung agüja, nendaka aser bendanga agütsür meranga inyakba bureaucrat tem rongnung pa ya ka liasü. Pa asüba ajanga tanü Nagaland nung bendanga agütsür tenzükba bureaucrat tem rongrong kisung masü saka Ao kin atema tapok tuluka apar, ta DALT ajanga ashi.

Pai tongmelang, ajemalua aser bendanga agütsür mapa inyakbatem danger atema teti tatishitsü ka liasü.

Pa den lokti maparen nung tetir ka ama sendaktepa aser tesüiba küm aika shisa agir ka ama liyonga aruba ya maongka tulu ta züngshir. Iba anogo asür kinungtsü Ruovi aser kibong den külemi mang ayimer aser Tulusang Tsüngremi nenok nem tashi aser tasü tait molungsentsü agüjang ta sarasademtsür, ta DALT sangdong ajanga ashi.

Nagaland Chief Secretary, Temjen Toy IAS, mapang talangka shiranga arur January 28, 2021 nü Kohima nung asüba atema mangyim tejashi lemsateper, ta Naga Hoho sangdong ka ajanga ashi.

Pa ya bendanga agütsüba, tenendak aser nukla tajung aketba lenir aser iba dak alia kanga tongmelang takum ka liasü. Administrator ka ama pai menden balala nungi state aser Naga nüburtem tenzükogoo. Pa nübur ajungtsü asoshi inyakba mapatem teti bilemettsü.

Mangyimer kibong den asükhu lemsateper aser pa tanüla teti tatem maka anisüngzükjang ta sarasademtsür, ta Naga Hoho tir, H.K Zhimomi ajanga sangdong ka nung ashi.

Kohima nung January 28, 2021 nü Temjen Toy IAS, Chief Secretary, Nagaland asüba osang angazüka Nagaland Tribes Council aoksar aser mang ayimer.

(Maneni tapak 10 nung...)

tenzükba aru," ta sangdong nung metetdaksü. Pai State tenzükba ya tarutsü lanu putu asensor ajaki bilemettsü, ta kasa sangdong nungsa ashi.

NPF Mokokchung Division lenirtem ajaki asür kibong den mangyim tejashi aser asükhu lemsatepba den iba ama molungzürep mapang Tulusang Tsüngremi iba ama tejashi mapang asür kibong nem molungsüngzüka agütsütsü aser asür tanela anisüngzüka nung yutsütsü tamang sarasadem, ta kasa sangdong ajanga ashi.

National Geographic-i 'Postcards from Arunachal' sayutsü



National Geographic teloki Itanagar nung Arunachal Pradesh chief minister Pema Khandu den ajurutepa sensaksem dang agiba noksa angur.

Guwahati, January 29 (Agencies): Arunachal Pradesh chief minister Pema Khandu-i Itanagar nung National Geographic channel telok ka den ajurutepa sensaksemogo.

National Geographic-i 'Post Cards from Arunachal' ta ser documentary kar yanglur aser iba atema

parnok sendenji amen. 'Post Cards from Arunachal' nung state tobur ajungba, kin balala, sobaliba, chiyungtsü tem sayutsü. Iba sentong ajanga Arunachal nung tourism ajungkettsü, ta Pema Khandu-i ashi.

February 20, 2020 nü National Geographic nung

documentary temji sayutsü. 'Post Cards from Arunachal' documentary tem yangluba National Geographic channel telok den tanü ajurutepogo. Iba ajanga Arunachal nung tourism tsütsü tajangzük aliba sayutsü, ta Pema Khandu-i Twitter nung metetdaksü.

Assam nung Feb 1 nungi Hostel tem lapoktsü

Guwahati, January 29 (Agencies): Assam ajungalen February 1 nungi Hostel tanaben lapoktsü terenemba lir.

Final year kaketshirtem atema yaküm December ita hostel shilem kar lapoka liasü, saka Assam sorkar sangdong ajanga ashiba agi, boarder (hostel nung alirtem) ajak yimya ka nung tanaben hostel-i arutsü.

Ajisüaka, hostel nung dang alitsü molunga alir kaketshirtemi pei pei tsurabur dang nungi temelaba agir sülen ang arutettsü.

Hostel-i tanaben meyipa arur kaketshirtem indang senzüsönbongba osang ajak hostel tekolakpurtemi jung junga bendentsüla.

Assam Sorkar ajanga agütsüba SOP tasenba nung, sorochiokdak, metsümeshidak, dining room aser dormitory jungjunga mesen asütsü mozü agi merüksüla, ta shia lir.

Ano külen, Assam State Education Department ajanga agütsüba SOP nung class ajak atema February 1 nungi shishaliok rejutem lapoktsü asoshi tetuyuba agütsüogo.

Tawa tashi Assam nung

Covid-19 wara tasen puteter ajema akümba asadanga iba telemtetba ya agia liasü.

February 1, 2021 nü nungi tenzüka lower primary - class 1 nungi 5 aser upper primary - class 6 nungi 10 tem atema anogoshia class agitsü.

Kasa anogo, class 9, 10, 11 aser 12 den külemi engineering colleges, polytechnics, undergraduate level, universities ajak tenzüksü.

Iba SOP nung, class metenzükdang, school classrooms, hostel rooms aser temeket ajunga merüktettsü shia lir.



Guwahati nung Congress MP Gaurav Gogoi-i All India Professionals' Congress (AIPC) züngsemtem den külemi auto-rickshaw ka nung mener Greater Guwahati Auto Rickshaw Association senden nung adentsü atema aodang agiba noksa angur. (Guwahati, January 29)

Tripura Police-i tesayur 12 anema ken o benok

Agartala, January 29 (Agencies): Bodbarñü Agartala nung police aser lungkak aitba tesayurtem tsüngda raraba dak sendakba nung Tripura Police-i tesayur 12 anema FIR benokba.

West Agartala Police station nung ken o ana benok aser police-i tesayurtem dangi osangtem sangoktsüogo.

Iba lendong nung police aser tesayur ajak meyokteper nisung 100 tema yiru. Tesayurtemi Tripura chief minister Biplab Deb'er kima nung lungkak aittsü merandang iba ya atalok.

Iba dak sendakba nung police-i nisung 200 tema apu.

Police-i Kamal Deb, Dalia Das, Bimal Saha, Ajoy Debbarma, Dipankar

Debbarma, Prashanta Debbarma, Mintu Debbarma, Bijoy Krishna Saha, Amulya Debbarma, Piyali Dhar, Soma Deb Datta aser Debasish Sarkar nung anema ken o tem benok.

Bodbarñep West Tripura District Magistrate aser collector Shailesh Kumar Yadav-i iba tesem nung nisung adenshitsu memelar ta asüba ozüing agütsü.

Iba sülen police-i Chief Minister'er ki anasa lungkak aitba tesayurtem anema mapa inyaka ao.

Iba mapang yirurtemji Agartala Medical College & Hospital aser Indira Gandhi Memorial hospital nung anir oa anepalu.

NPP-i GHADC election nung takok angutsü: Meghalaya deputy CM



nung NPP-i Executive Committee nunga BJP dena liasü.

Taoba kümsüktem nunga GHADC nung senotsü tim mesüi amshiba ken o tem adokogo, ta Tynsong-i metetdaksü.

"GHADC nung onoki inyakdang dang masü saka taoba mapang nunga senotsü tim mesüi amshiba ken o tem adokogo. Iba jagi directorate of local accounts ajanga bushisüngdang ka tenzükogo" ta paisa ashi.

"Iba ya Directorate of Local Accounts ajanga indangidanga inyaker kechiyong sen endokba balala atema audit & scrutiny nungdaker. Iba atema mapang agitsü aser bushisüngdangertemi mapa inyakdar" ta Tynsong-isa shisem.

NPP anema ola adokba ajanga GHADC election nung timtem ajurutsü asü koda ta osangbeneri asüngdangdang "Yamaji majurutsü. Nübertem onok den lir aser ozü party pusemer" ta pai langzü.

Shillong, January 29 (Agencies): Garo Hills Autonomous District Council (GHADC) election nung NPP-i takok angutsü ta Meghalaya deputy chief minister Prestone Tynsong-i ashi.

"April 14 nü votes azüingdang ni NPP indang osang tejangja ashitsü, saka Council nung nungdakba nübo onoki peria angutsü" ta Tynsong-i ashi.

GHADC nung NPP-i aniba Executive Committee ajanga senotsü tim mesüi amshi ta nisungtemi aitsür aser aitsürtem rongnung Meghalaya BJP dena lir. Meghalaya nung NPP-i aniba MDA sorkar nung BJP densema lir.

Taoba mapang GHADC

Congress-i Mizoram minister merenshitsu akhanger

Aizawl, January 29 (Agencies): Rural development minister Lalruatkima-i social media nung Mizo accord indang osang tiyazü sangdongba atema merenshiang ta Mizoram Pradesh Congress Committee Youth wing-i state Governor P S Sreedharan Pillai dang shiogo.

Lalruatkima ya State information & public relations minister lir aser pai Facebook nung Mizo National Front (MNF) aser India (1986) tsüngda memorandum of settlement indang photocopy ka sayu, ta Congress-i ashi.

Iba ya yaküm November 6 nü atalok.

Lalruatkima-i MoS photocopy ka sayuba nungji "North-Eastern Areas

(Reorganization) Act, 1971 nung aliba ama Mizoram indang lushi latettsü" ta aliba nungi "Bengal Eastern Frontier Regulation Act, 1875 nung aliba ama Mizoram indang lushi latettsü" ta melenshia lir, ta Congress-isa metetdaksü.

1986 küm MNF aser India sorkar tsüngda Memorandum of Settlement ajanga "Mizoram indang lushi North-Eastern Areas (Reorganization) Act, 1971 nung aliba ama latettsü" ta parnokisa ashi.

Mizoram-i Assam den arrtsü mangatettep adoka aliba mapang ka nung Lalruatkima-i Wikipedia nung kulikaket yanglushir nübertem mashileni anitsü merang. Pai Indian Constitution mezüingmeshiogo, ta Congress-isa metetdaksü.



TIR YIMYIM YIMOBILEM (EDITORIAL)

DIMAPUR KÜPTOKNÜ, AENJETI (JANUARY) 30, 2021

Parliament tiptema agitsüla

- P *Tiamongba Aier*

Linük asoshi kanga dang tongtipang mapang ka nung Hokolbar nungi Parliament nung Budget Session tenzükogo. Centre-i küm aika rongsenkettsüng tsütsü mapa junga meinyakteti aruba sülen nübortemi tan Budget Session nungbo rongsenkettsüng jenjang shia arudaktsütsü atema sentongtem benoktsü akok ta teimla tulu lir. Ajisüaka, tesüiba mapangtem ama tan Budget session yaa tiptema magiteti tembangtsü asü ta bilemer, kechiyong Hokolbarnü Opposition party aikati Farm Laws agienang ta takhangba agüja lungkak ait tenzükogo. Maneni, Opposition party 20 temai India Tir Ram Nath Kovind-i Parliament nung o jembiba mokdanga liasü. Iba jagi Parliament session tenzükba anogo nung yamai sayuba ajanga session agiyonga aodang sorkar aser opposition tsüngda mepetmesü aser mangatetep tuluba adoktsü amai bilemer. Sorkar aser opposition tsüngda tekong merangtepdang, külem telemtetba tajungtem kecha magiteti, sorkari molungba ama dang telemtetbatem agia, taruba financial year nungji linük nung rongsenkettsüng jenjang tamajungba akümtsü asü ta shisabulur. Alima ajungalen Covid wara ajanga rongsenkettsüng timtem tulu bentsür aruogo aser iba khuret yagi India nunga kanga mejungi kongshiogo. Anungji shitakba agibo tang ya India nung political party ajak tangatetep nung linük rongsenkettsüng jenjang ajungkettsü aser shia arudaktsütsü atema shisatsü lemsatempa telemtetba tajungtem agitsü mapang ka lir. Yaküm Parliament Monsoon Session nung Centre sorkari Farm Laws asem yangluba ajanga tanü linük nung khuret tulu ka ajurua lir. Anungji, Centre-i iba nungi angazüker, opposition teloktemi ashiba angaa, ajak ajungtsü atema telemtetbatem agitsüla. Yaküm Opposition-ibo Farm bill temji parliamentary committee ka nem agüja mapa reprangdaktsütsü shidanga liasü saka Centre-i magizük. Külen, Hokolbarnü opposition teloktemi Tir Ram Nath-i o jembiba mokdangbaji tim masü aser yimya tamajung lir. Party mesüra party temi langka nung jashir mesüra obang meputep adoker Parliament session nung medeni lungkak aitba ajanga tajangzük kecha mangur. Yaküm opposition-i sorkar dang jashiba agi senden nung maden aser iba jagi sorkari zübazüba dang farm bill tem agizüka ozüng aküm aser tanü ibaji ajanga linük yimtiba Delhi nung aluyimertemi ozüng alema mapa inyaktüsü tensa ka ajuruogo. Iba lendong ajanga senden nung medeni lungkak aitba nung tajangzük kecha maliba jangjangja sayur. Kasa mapang nung, Centre-ia opposition tebilemba magizüki ozüng yangluba ajanga tarutsü nung tetsükdaktsü ajurur ta asüba iba tatalokba ajanga sayur. Hokolbar, January 29, 2021 nungi Budget Session tenzükba ya February 15 aser March 8 tsüngda sodi agiba sülen April 8 nung ang tembangtsü. Iba session nung taruba financial year atema Union Budget benokba den külemi tongtipang bill aika benoktsü lir, anungji Centre aser opposition telok ajaki nübortem asoshi tebilemtsü khuret bona, tesüiba mapangtem ama mesüi tiptema agiyonga aotsü merangtsüla. Farm laws atema linük ajunga anokshitsüsa tensa ajuruba nungi angazüker, Parliament nung party ajaki olemtepba nung shilem agia vote enoktsüteper ang tatembang telemtetbatem agitsüla. Linük nung sensotemi Parliament agiba nung tamang akatsü atema aser linük rongsenkettsüng jenjang kanga mejungi aliba shia arudaktsütsü atema party ajaki akokba tashi iba Budget Session nung shilem agitsüla.

OLEMSABANG

Arogo ka nung Sannüker (Tepong I)

Talitemjen Imchen

Kipong noklang tenet metser ka aliba yim ka nung arogo ka dang liasü. Arogo tentet yimya ama, sannüker-i anir doklang inyaker (fulltime worker) aser deacons teperi kar. Ajak Christian tamangertem dang. Mapang shia asentenshi (revival) sentong akar. San ajaki Laishiba zünga oteter, ken tenteter, ya temenen mapa, ya temeshi mapa ta meteta lir. Asendenshi akaba shia santem den tanela temeshi ajanga tejempiba aser sayatenya inyakba jenti kar. Arogo ji teti dang tanela temeshi akaba Arogo liasü.

Par Arogo nung santem tarongba ka teti liasü. Sannüker-i ajok amer, moapu tajung nung san shia dang ajok sayua, santem anir anüko (anogo) shia jajaba ama, sannüker-i kilen kata mezüdoki, pei kipong den tapet Lai tekongtem sayua kipoksema jajadaksüner. Iba nanüng olaji tamasabo kipok nung dang liasü. Saka nanüng tuluba küma jempitep. Telok tuluba küma jempitepdangji, santem ajak asoshi sannüker-i kipoksem odaktsünübaji kanga nanga jempitet. Joko kija nung dang masü, telok telok tenteter, iba onük tajungji bener sannüker dangi arua ashitsü tenzük.

Kipok shia kipoksem odangtsünüba ji Sannüker-i züngdang nung, kipong ajak nungi arua ashir ama züngtet. Sannüker-i kipoksema senzütsü wadang (ministry)ji tajung ta meteta dang liasü. Saka pai meinyaker. Yimer-i ajungshiba yimya nungji, pai khen khenbo pei inyakyonga aruba inyakyim (duty) ji züngdang. Hopta ka nung sentep ana benbosa tensa den apet onük pushir jempitsüla. Kasa hopta nungji tasütama, tanur asoba aser meshitetba benjungbentsü yimya (normal) nungji pezü benbo ajurur. Ano kitsükinar Arogotem-i jaokba, teloktesen nung sarasatemtsü agütsüba aser ABAM Mongdangi aoba nung mapang indokba ajakji asadang nung, hopta shia anogo ka ka agi atar. Iba den külemi Arogo menden (office) nunga mapang shia santem süisüponger asoshi atatsüla. Saka Arogo san ajaki melongba yimya nung aser parnok sayasako yimya nung, pai taruba küm tasen January ita nungi kipoksem tenzüktsü telemtetba tajung agi. Iba o tajung angashia yimertem kanga pelatep. Pai mapalem (routine) ji yangludang nung, kipoksem tenzükter senzüdangji, kipong 721 ajungai aotsüsa akümtsü. Anogo shia kipong anana agi kipoksem otet nung, küm ana nungang omatsü. Ajia küm kabo talangba küm (leap year) ajuru nungang. Sentongji kanga tasak, saka pai mapalemji yanglu.

Küm tasenba nung sannüker yangkhu temerem ka nung Laishiba aser Ken kakat bener kipoksem tenzükba ngua, sannüker ji tepango dang masü mapa lir ta yimertem-i kuli tajung angu. Parnoki sannüker kipoksem mesenzüba indang nemnema aliba, tepela agi melena sannüker indang tajung jembiba aser Tsüngrem-i mapa inyaker ta Pa tenüng tali sanga pelatep.

Anogo, hopta aser ita songtema kipoksem senzüdang, yimertem kanga temoatsü angu. Kipong kata mezüdoki kipoksem senzüba mapang, kenübo Director kipong ka ajuru. Director jagi pa ita shia itasen koi angur kanga shiabo mepilemer aser mezüngdang. Saka pa matric passed asüba küm tepela agi sannüker nem Christmas cake ka alir agütsüba, sannüker kidangi ayaketa atudangji kanga jangja pilemtet. Alishi lu ayimer kipong katia, küm shia jen sünga alishi bendenba atema, Tsüngrem dang pelabajibo mepilemteter saka Mongpu ita atsü nung alishi tutetli sannüker nem agütsübabo teti pilemteter.

Kipoksem senzüba agi sannüker pei wadang (ministry) nung tamakok alubaji temetetka dang. Saka koda masüka kar kipong züdok nunga, kipoksem arur kipongtem-iang ayongdena sannüker majung jempitsü aji par yimer yimya. Sannüker itasen tera dang asüba agi, kipong timtem nung atepangtsü atema, kenübo kinüngtsüi atsü nung adokba aonsotsütem bener oa shishilemadak (bazaar) mener yoka lia, yimer kari angu aser paonungji kidangi oa, sannüker kinüngtsü kati yamaji inyakbaji mazü ta shia joko songtemtsü.

Sannüker-i kipongsem tenzükter, joko ita terok tenet aoba mapang, pa wadang nung tajurunertem-i aiben majurutetba agi nanüng adoka nemnemer telok ka adok. Saka sannüker nukjitongji kechisütir süaka, kipoksem ji kipok ajunga dangi atutsüla. Kipoksen senzüdang, kinüngtsüi süoshi nung iron agütsür jep jep ta süputeter senzüaka, yim tezülen lishi aser kilentsü agi lenmang nung süoshi tasen semer senzütsü tasak ajuru. Ano lenmang karbo kanga tanüla, nenja lir. Iba jagi kenübo rubber tsüngsem talang asem aser süoshi tajung masü, teyari ka dang agir jajaba mapang. Lenmang onsara majung khenbo ajuchir alanga temang nung lishi lir. Saka par kidang nungi olioratsü talang asünung odang senzü. Pa yamaji süpur kipoksema senzüba mapang, chila (town) nungi tasü mang ka aremtsü yim pushia aru. Tasü mang agizüktsü atema tsütemmonger kar sannüker pushia aru. Kidangi or süoshi melena tejak tepang shidoker arutsü mapangji petdakpetdaker. Joko kipoksem kidang nungi dang tasü mang ayudak ki pushia ao. Pa tasü mang alidak atongdangbo, yimer aser chila nung alirtem ji wangwanga dang menteper liasü. Joko sannüker mapang shidak nung matongba ajanga, telokji terabo nemnemadoker lia, sannüker parnok tsüngdang rubber tsüngsem talang semer süoshi aser temang nung lishi teper arua nokdak.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

AP nung aliba Tenla ki ka nung Hindu nunger wako songa yutsü



Andhra Pradesh nung Cudapa district kübok Chittimitti Chintala yimdak aliba Arogo Tenla ki noksa nung angur.

January 29, 2021: January 17, 2021 nü south India nung aliba Tenla ki ka nung nisung kari Hindu nunger saffron wako ka songa yutsü; coronavirus wara aliba agi iba Tenla kiji tesüiba ita 10 tashi shibanga liasü, ta ICC osang ajanga metetdaksü.

Iba tatalokba ajanga Khristantem kanga mepelaba dang masü saka Hindu yimsü alia amangertemi maneni parnok anema inyaksüa akok ta tsübur.

Andhra Pradesh nung Cudapa district kübok Chittimitti Chintala yimdak aliba Arogo nungji pastor, James Prasad-i, Hindu nungeri iba yimdak Khristan yimsü melidaksüner, ibayongji parnoki Khristantem anema inyaker, ta metetdaksü.

Ita 10 tejaklen Chittimitti Chintala yimdak lenirtemi Pastor Prasad aser par kibong yimdak nungi aridoka liasü. Yimdak lenirtemi pastor senden kati jaokba sülen pa dang, iba yimdak Tenla ki mesüra Khristantem tekülem sentong agiba onoki maginer, anungji ner kibongi yimtsüng toktsür oang, ta metetdaksü.

International Christian Concern (ICC) den jembidang pastor-i, "Onoki Chittimitti Chintala yimdaki meyipa mouteter aser onok tesem ka nungi kati oa alitsüji kanga tasak. Ni iba kidangji küm 22 liogo, ajisüaka tangbo yimdaki meyipa mouteter," ta metetdaksü.

Arrshi küm 48 pastor Prasad-i küm 22 tashi

Chittimitti Chintala yimdak Khrista osangtajung proka aruogo. Tamasabo pai kibok sema jaja aser tesülenbo pai Tenla ki ka yanglua Khristan 50 shi tekülem sentong agia aru.

Tangbo Pastor Prasad yimdak nungi aridokba ajanga Khristantem parnok-a yimdak nungi aridoktsüa akok ta tsübuu bilemer.

Pastor Prasad-i pa yimdaki tanaben meyipa aotsü atema police dang teyari meshidangogo, ajisüaka police-i pa yaritsü memelunger.

"Ni taginüba ajak agi, yimdaki meyipa oner. Yimdak aliba Tenla ki tanaben lapoka amangbapurtem tekülem sentong agitettsü asü magitettsüar ni shisadanger," ta paisa metetdaksü.

UN-i tamangba yimsü dak sendakba tesemtem kümzüka ayutsü

United States, January 29, 2021: United Nations General Assembly (UNGA)-i alima tesem balala nung tamangba yimsü dak sendakba tesemtem raksatsüba aitsüba dang masü saka item tesemtem kümzüka ayutsü atema bangzüng ka renemogo.

UNGA bangzüng ajangasa United Nations (UN) Secretary General dang alima nung tamangba yimsü dak sendakba tesemtem kümzüka ayutsü

atema senden ka ayongzüka, ta metetdaksü.

Iba maparen ya takok ngua inyakra alima tesem balala nung Khristantem anema inyakra terabo ajema akümtsü, kechiyong tang alima tesem balala nung Khristantem indang tekülem ki aser kiojentem raksatsüba kanga bulua ataloker.

UNGA bangzüng nungji tamangba yimsü dak sendakba tesemtem nung security agütsüsi atemabo shia mali,

ajisüaka Khristan nütsüng aliba lintüktem nung nüburtem nem iba indang awareness agütsüba ajanga nüburtemi iba mapatong pusemstsü.

United Nations dang masü saka tentet balalai Universal Declaration of Human Rights temzüng kübok Arrla 18 shidak benoktsü atema inyaksüla. Iba Arrla ajanga alima nung tamangba yimsü dak sendakba amangtsü atema nisung ajak nem temeden agütsür.

Armenia Khristantem indang kiojen aika Azerbaijan kübok lir

Nagorno-Karabakh, January 29, 2021 (Agencies): Meimchir temeden telok kati, yaküm November 9 nü Azerbaijan aser Armenia na tsüngda yimjung tezüngzüktep agiba sülen Armenia Khristantem indang kiojen aika tangbo Azerbaijan kübok lir, ta shia UNESCO dang item tesem wazüka ayutsü atema inyadaksüner, ta mepishia metetdaksü.

Nagorno-Karabakh nung tangbo Khristantem indang

kiojen 1456 bo Armenia litsü kübok mali; item kiojen rongnung Tenla ki 161, long agi chitetba Kangki 591, o zülua aliba long mesüra leper long 453, ki 43 aser tanga nüngshi oset 208 densema lir.

Item kiojen rongnung akhidang Tigranakert yimti densema sites aika lir. Akhidang nungi Azerbaijan nungeri Armenia Khristantem indang senmang sites raksaja arur; 1997 küm nungi 2006 küm tashi nung Armenai

Khristantem indang nungshi oset aser leper long 50,000 dak tema raksatsüogo, ta kasa report nung shia lir.

Tawa Azerbaijan nungeri Armenia nunger litsü atsüngba mapang nunga Khristan indang sobaliba tesem aika raksatsüogo.

Armenai Khristantem indang sobaliba tesemtem aser kiojentem kümzüka ayutsü atema UNESCO-i tiyongtsüi aita inyaksüji kanga tongtibang, ta report nung shia lir.

ANO GO ABEN TSÜNGREM DEN

Temeshiba arishiang Rom 14:19

Tanela nung tain akümba temaitsü kaji tangar süneptsütsü aser tashi itdaksütsü asoshi pei tesünep tenlatsü mulunga alibaji lir. Pauli yimjung zeintsü mapa dang arishitsü aser tangar yanglushitsü leman dang bushitsü ajungshia zülu.

Arishiba tetezü kecha agia matsüitdaksüi alizüng tonga aotsü merangba. Ibai aoksa inyakba mapa masü. Iba nung yimjung asoshi aser tangar yaritsü asoshi Tsüngremi agütsüba ajak dena lir. Pauli Kolosi arogo dangi Khrista nung nisung ajak tabensa kümdaksütsü meranger ta zülu (Kol. 1:28-29).

Paul asoshi Khristantem yaritsü shimtetba tetezü koba mapa agi tangar metsüdakdaksür iba mapa nungi pilaa alitsüba. Pauli pa temeden aser tesünep indang mebilem, saka pa tebilemba tulubaji tangar tashi Khristan akümbaleni anitsüba liasü (1 Kor. 14:12,24). Ibai Yisui nütsüngtem den koda sendaktep aji lir. Kati ka asoshi taküm yutsüba dang tuluba temeim mali ta Yisui Pa nütsüngtem dang sayu (Yn. 15:13). Khristan ka ama asenok rongnung kati ka tamang nung itdaksüba mapa nung bendanga agüja inyaksüla. Iba libaliro yagi mezüng Khristantem jakla sayur (T.M. 2:40-47). Ibai Tsüngremer nübur rongnung temeimji lir (Gal. 6:9-10).

Na meketa alir parnok tamang nung aintsü asoshi Tsüngremi jungkai adoka sayudang medemer Khristantem asoshi nungdakba tenla agüja yaritsü renemang (Kol. 1:29).

US nunger million aika wara mapang pei tanela asentenshiogo

January 29, 2021: America nunger shilem pezüsü nungi shilem ka dak temai coronavirus wara ajanga pei tamang jenjang tajungba kümogo ta ashi, ta poll survey ka ajanga bushitet.

Ano America nung aikati coronavirus wara ajanga pei kibong züngsemtem den tesendaktep tajungba küma yangluogo, ta Pew Research Center survey ajanga bushitet.

Iba survey nung shilem agir America nunger shilem 28-i, coronavirus wara mapang nung pei tanela jenjang tashi taitba kümogo, ta ashi aser shilem 41-i wara mapang nung kibong züngsemtem den tesendaktep tajungba kümogo, ta ashi.

Iba tetezü coronavirus wara ajanga America nunger million aikati pei taküm nung tajangzüku nguogo, ta Pew Research Center survey ajangasa metetdaksü.

Wara mapang nung pei tamang jenjang tajungba akümer timtibaji (shilem 28) US lir, iba sülen tanabuba jenjang

nung Spain (shilem 16), tasembuba jenjang nung Italy (shilem 15). Iba sülen Canada (13), Australia, United Kingdom, France aser South Korea linüktem (ajak shilem 10) jenjang pezübuba nung lir.

Coronavirus wara nokdangtsü atema Tenla kitem shibanga liasü, ajisüaka online ajanga Khrista osangtajung lemsatepba ajanga nisung aika taküm nung kongshio.

Ano nisung karibo, coronavirus wara ajanga parnok tamang jenjang tashi maitba kümogo, ta ashi, ajisüaka iba shilemji ishika dang lir.

US nunga, wara ajanga pei tamang jenjang tashi maitba kümogo, ta ashirtem shilem 4 dang liasü.

Wara mapang pei tamang jenjang tajungba kümogo ta langzür timtibaji Evangelical Khristan temesüng nisungtem liasü (shilem 49), iba sülen tanabuba jenjang nung Catholic Khristantem (shilem 35) liasü, ta Pew Reserch survey ajangasa metetdaksü.

OLONG PAITEP # 5709

	1		2							3
4					5		6			
7										
			8							9
10									11	
							12			
13								14		
15										

TIPILEN

- 1. Taochi sayuba - 10
- 4. Temezüng agi kongshi - 4
- 5. Ainer - 6
- 7. Chiyungnü - 3
- 8. Mi nung atsük - 5
- 11. Asen masü - 3
- 13. Lenmang ajurutepdak - 6
- 14. Yangi masü - 4
- 15. _____ jang - 6

LANGTSÜNGLEN

- 1. Menungra - 6
- 2. Mi tsükloker mesebpa - 4
- 3. Süngo o tzü ajemba - 5
- 5. Temenemsü tajung - 7
- 6. Idak - 4
- 8. _____ ok - 4
- 9. Tebangi apuba kongki tapu ka - 6
- 10. Tashi endokba metet - 5
- 12. Tzü manung senzüba - 4

OLONG PAITEP # 5708 TELANGZÜBA


TIPILEN :

- 1. Rebeka, 4. Adam, 6. Yohan,
- 9. Zü, 12. Sayutsüngir, 15. Ku,
- 16. Naman, 17. Abel, 18. Samuel.

LANGTSÜNGLEN :

- 2. Kan, 3. IM, 5. Anüng, 7. Amsü,
- 8. Yosep, 10. Sara, 11. Isak, 13. Yakob,
- 14. Nana, 16. Noa, 17. Am.

Nai Ongo ya inyaktettsü asü ?

 +  +  = 12

 +  +  = 18

 -  = 2

 +  +  = ?



TANÜBO NAI LANGZÜANG

Q. DPIIT-i National Start-up Advisory Council kodang tenzük ?

- A. January 2021
- B. January 2019
- C. January 2020
- D. January 2000

(Taruba adok nung onoki langzüsü)

YASHI ADOK TELANGZÜBA : A.R.Chenab

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAI-A YA METETTER MA?



Louisville, Kentucky nungi arishi küm 12 tain Haddon Haste-i LEGO® Star Wars Millennium Falcon micro fighter' kara atongtepa yangluzükba atema record tasen ka ajangzük tetogo. Haddon-i iba Lego set ya minute 1 ser second 59.72 nung atongtep. YouTube sabang nung Dude Perfect telok ajanga record balala yanglubatem repranger sülen, Haddon-ia Guinness World Records title atema merangdangtsü mulungtet.

SUDOKU # 5750

			5	7	6	9	1	
	7		9		4	3	2	5
5	8	9	2	1				
2		7	6	5		1	9	
				9	2	7	8	4
9	1		7		8	6	9	1
			8		1	7	3	3
	6						4	6
8	2			6	7	5		7

TELANGZÜBA # 5749

5	8	4	1	2	7	3	9	6
2	7	9	8	3	6	4	5	1
1	3	6	9	4	5	2	7	8
6	2	3	7	5	9	8	1	4
8	4	7	6	1	3	5	2	9
9	1	5	2	8	4	6	3	7
3	9	8	4	7	2	1	6	5
4	6	2	5	9	1	7	8	3
7	5	1	3	6	8	9	4	2

OJANG LUTEP # 5297

NGYAKOP	:						
KA	:						
GNNU	:						
GILSYONHU	:						
IKAA	:						
AALUGJYONI	:						
ÜPBYOGKON	:						
AK	:						
DNGA	:						
ARLI	:						

OJANG LUTEP TELANGZÜBA # 5296

KECHI MAPASA INYAKDIR TAMASA JUNGJUNGA TATEM
TASHI SHISADANGER NÜKLA YUADOKANG

TAN HOPTA ATEMA - KOMA SÜLA ?

Q. Nagaland nung ya Assembly constituency 40 dang aküm nunga süla ?

Delhi nung Israel Embassy anasa bomb apok



January 29, 2021 nü New Delhi nung aliba Israel Embassy anasa bomb ka apokba sülen iba tesem anasa police nokdaka aliba noksa nung angur. Israel Embassy anasa bomb tilaka apokba ajanga gari kar raksa, ajisüaka shinga meyiru, ta police-i metetdaksü.

New Delhi, January 29 (Agencies): Israel-India tesendaktep yanglur küm 29 ajungba anogomong nung (January 29) New Delhi nung aliba Israel Embassy anasa bomb ka apokba ajanga gari asem raksa, saka nisung yiruba mesüra asüamaba osang mali, ta Delhi police-i metetdaksü. Hokolbar nikongdang 5:05 ako meta bomb ji apokba sülen National Investigation Agency (NIA) aser Delhi Police Special Cell iba tesemji tonga oa bushisüngdang tenzükogo. Iba tesemji longbangogo aser police aika lezmüksüba dang masü saka Central

Reserve Police Force (CRPF) team ka Israeli embassy dangi security yokogo. Delhi police-i sangdong ka ajanga, "Nikongdang 5:05 ako meta Jindal House anasa APJ Abdul Kalam Road nung bomb tilaka apok. Tang tashi nungbo nisung yiruba osang mali mesüra kiojen meraksa, ajisüaka anasa anena aliba gari kar raksa," ta metetdaksü. Osangbener den jembidang Israel Ambassador to India-i, "Israeli mission kanga kümküma lir, aser telung nung alir ajak jungadang lir," ta metetdaksü. India aser Israel na tsüngda

tesendaktep yangluba sülen küm 29 ajungba anogomong nung iba lendong ya atalokogo. Bomb apokba tesemji Vijay Chowk nungi kilometer 2 den tajemba pilar lir. Bomb apokba mapang nungji Vijay Chowk nung Beating Retreat ceremony nung Ato kilonser, Narendra Modi aser linük Tir, Ram Nath Kovind na densema lenirtem aika dena liasü. Union Home Minister, Amit Shah-i Delhi Police Commissioner aser Intelligence Bureau ketdangsertem den iba osang metetpelaogo aser pa nem osang metetdakang ta tuyuogo.

Singhu arrtsü nung tensa raksa; Police-i ajok aser tear gas amshi

New Delhi, January 29 (Agencies): New Delhi telungi aiba points- Singhu aser Ghazipur arrtsü nung ano aluyimertem taliba adenshia Hokolbar nep tashi nungbo tensa raksatsüsa akümba agi police-i tashiyim amshitsüsa aküm. Hokolbar nikongdang Singhu arrtsü nung aluyimertem aser lenmang nokdangtsü atema aruba telok ka na tsüngda rara adoka long agi ontepa liasü. Telok ka jagi kiojen raksatsüba aser aluyimertem dak long agi aonba nokdangtsü atema Delhi police-i ajok agi azükba den tear gas amshia liasü. Nisung aika yiruogo, ta osang angazüker. Aluyimer lenirtemi, Mahatma Gandhi asüba anogomong (Martyr's Day) nunga Delhi aser yimtsüngtem nung longkak aittsü, ta metetdaksüogo. Parnokisa ashiba agi, Delhi deputy chief minister Manish Sisodia densema sorkar ketdangser aikati aluyimertem ajurua parnok indang camps nung tzu aser light agütsüsü ta nangzükogo. Brihostibarnü aluyimertem tractor rally nung rara adokba

noksatem social media nung prokshiba sülen ano state aika nungi aluyimertem ajungmesoa Delhi nung adenshidar. Hokolbarnü Haryana nungia aluyimertem noklang aika Delhi arrtsüleni apusoa ogo. Republic Day nü aluyimertem aser Delhi police na tsüngda raradang police 400 dak tema yirua liasü aser aluyimertema aika yiruogo. Iba tatalokba dak sendakba nung FIR 33 benokogo aser FIR nung aliba aluyimer lenirtem 44 aputsü sangdongogo. Hokolbarnü osangbener den jembidang aluyimer lenir kati, "Aluyimer lenirtem anema inyakbaji onoki magizükttetsü. Onok ajak longjema lir aser sorkari aluyimba ozüngtem magien tashi onoki longkak aittsü," ta metetdaksü. Haryana BKU tongti, Gurnam Singh Chaduni-ia video ka ajanga aluyimertem dang Delhi arrtsülen longkak aitba tesemi arua shilem agizüktsü ayongzükogo. Paise aluyimertem dang January 30 nü Haryana nung aliba toll plaza ajak nung mener longkak aitag, ta mepishia metetdaksü.

Aluyimba ozüng nung SC obendang sorkari akümtsübuttsü: Tir Kovind

New Delhi, Aenjeti/January 29 (Agencies): India linük Tir, Ram Nath Kovind-i aluyimba dak sendakba ozüng tasen asem pusema jembiba den külemi Republic Day nü aluyimertem tractor rally nung rara adokba tatalokba sashia aittsü. Parliament nung Budget senden mezüngnü House anaprong nungi züngsemtem den jembidang Kovind-i, January 26 nü Republic Day nü longkak aibaji kanga tia maka aser iba ya linük wako mezüngmeshiba lir, ta ashi. "Linük temzüng ajanga pei tebilemba jembitsü atema asenok nem temeden agütsür

süra kasa temzüng ajangasa asenok dang tzüzüng-ozüng shidak benshitsü tuyur," ta paise ashi. Opposition party 20 dak temi aluyimertemi ozüng tasen asem anema longkak aitba pusema Parliament nung Tiri jembiba mapang senden nung maden. Tiri jembiba mapang nung Congress MP, Ravneet Singh Bittu-i 'Jai Jawan Jai Kisan' ta yimiyim ayimba den külemi ozüng asemprong agientsü takhangba agütsü. Central Hall gallery nunga opposition MP kari sorkar anema yimiyim ayima liasü. Supreme Court-i aluyimba

ozüng asem soita lir, ta shia Kovind-i, iba onük nung Supreme Court-i kechi obendang agütsüdir sorkari akhümtsübuttsü, ta metetdaksü. Budget senden mezüngbuba shilem February 15 nü tembangtsü aser tanabuba shilem March 8 nü tenzükba sülen April 8 nü tembangtsü. Covid wara nung ajemdaker Parliament shilem ana lemsar amentsü. Anepdang shilem Rajya Sabha nem lezmüksü aser Lok Sabha nem nikongdang shilem lezmüksüogo. Tanbo Zero Hour aser Question Hour naprongla agitsü.



January 29, 2021 nü Muzaffarnagar nung Bharatiya Kisan Union (BKU) Tir, Naresh Tikait leniba nung 'Maha Panchayat' sentong agiba noksa nung angur. Aluyimertem pusema iba sentong nung nisung meyirjang aika aden.

Uttar Pradesh nung ano tebur ka Covid vaccine atuba sülen asü

New Delhi/Lucknow, January 29 (Agencies): Uttar Pradesh kübok Umaria jila nung arrshi küm 55 tebur ka coronavirus vaccine agiba sülen ghonda ishika tsüngda asü, saka CMO-ibo pa asübaji temelungjang tashidak agi asü, ta metetdaksü. Tamalena UP nung nisung ka covid vaccine agiba sülen asü, ajisüaka CMO-ibo pa asübaji temelungjang tashidak agi asü, ta metetdaksü. Par kinüngertemi ashiba agi, asür Pratap Ram ya Child Welfare & Nutrition department nung Class IV employee ka liasü aser Brihostibar anüngdang Mahila hospital nung pa coronavirus vaccine ajem tua liasü. Brihostibar nikongdangjisa pa shirang aser kinüngertemi pa hospital-i anir maodangsa süadok. Chief Medical Officer (CMO), Seema Agarwal-i, pa dak temelungjang tashidak liasü

asür Hokolbar nep yakta post-mortem agiba nunga pa asübaji temelungjang tashidak agi asü, ta shia lir, ta metetdaksü. Par kibong züngsemtemi ashiba agi, 2007 küm Pratap Ram dak temelungjang surgery agia liasü aser temelungjang nung 'tube' tilaka inokba sülen nungibo pa temang nung timtem kecha maliasü. Post mortem report nung ajemdaker CMO-i, pa temelungjang waaker liasü, ta ashi. Brihostibar anüngdang 11:35 ako nung Pratap Ram coronavirus vaccine agi aser nikongdang 5:00 ako nungbo pa shirang tenzük; kinüngertemi pa hospital-i anir maodangyongi pa süadok. Taoba hopta nunga Uttar Pradesh kübok Moradabad district nung arrshi küm 46, health worker ka coronavirus vaccine agiba sülen asü, ajisüaka post mortem report ajangabo pa temelungjang tashidak agi asü, ta metetdaksü liasü.



Ahmedabad, January 29, 2021: Hokolbarnü Ahmadabad nung aliba Civil hospital nung coronavirus vaccine agiba sülen health worker tem tangokba noksa nung angur.



World Health Organization team of researchers nungi züngsemtem central China indang Hubei province kükob Wuhan-i aotsü renemba mapang tangokba noksa ka yangi angur. World Health Organization team of researchers ya Wuhan yimti nung COVID-19 tashidak poktetba tera bushitsü atema China-i arur tang mezüngbuba parnok anenzükdak hotel nungi Brehostibarnü temai adok.

Pearl tepsetba ken o nung aija alisang Sheikh chioktsü tuyu

Islamabad, Aenjeti/January 29 (Agencies): Pakistan Supreme Court-i Brehostibarnü osangbener Daniel Pearl tepsetba ken o nung aija alisang Omar Saeed Sheikh chioktsü atema tetuyuba agütsüogo. Justice Mushir Alam-i aniba obendangertemi, 2002 küm Pearl tekolak atangba ken o nung Sindh high court-i Saeed medentsür aliba agintsü atema Sindh sorkari mepeshiba magizük aser ketdangsurtem dang pa chioktsü tetuyuba agütsü. Obendanger asem rongnung katibo iba obendang anema liasü, ta Pakistan media sangdong balala ajanga metetdaksü.

2019 küm Sheikh-i züluba shiti nung, Pearl tepsetba ken o nung pai tongti shilem magiba indang shia zülugo, koba Supreme Court nem hopta asem tejakdang agütsüogo. Bodhbarnü Sheikh okatsüri pai iba shiti züluba jangshitsüogo. Sheikh-i taoba küm 18 tashi pa iba ken o nung pa dena mali ta shia aruogo. Taoba küm April ita 2 nü Sindh high court-i Pearl tepsetba ken o nung Sheikh medentsü. Pearl ya The Wall Street Journal, South Asia bureau tekolakba liasü. High court-isa, Fahad Naseem, Sheikh Adil aser Salman Saqib nunger medentsü, shirnok Karachi nung anti-

terrorism court kati taküm tepeyong tepuokdak ayutsü obendang agütsür liasü. Iba sülen Sindh sorkar aser Pearl tsürapurtemi high court obendang anema Supreme Court nung ken o benok. Temepeshiba tem angadanga mapang Sheikh tepuokdak yua liasü. 2002 küm January ita Karachi nungi pur aoba mapang Pearl ya The Wall Street Journal, South Asia bureau tekolakba liasü. Pai Pakistan nung telungpur aser Richard C Reid na tesendaktep indang bushitsüngdanga liasü. Iba sülen Pearl ya Karachi nung pa pur aoertemi tepset.

US osangbener tepseter metentsüba atema Pakistan sorkar mepelar

Karachi, Aenjeti/January 29 (Agencies): US osangbener Daniel Pearl pua tekolak tangzüka yokba atema tai tonglokja alisang Islamist züngsem ka nem Supreme Court ajanga temeden agüja aliba asoshi United States-i mepelai sangdongba sülen tanaben asadangtsü atema Pakistan sorkari Hokulbarnü asüngdang.

Wall Street Journal osangbener pua tepsetba nung 2002 küm aija alir British nung soa intetsang Ahmad Omar Saeed Sheikh aser pa den külemi mapa tamajung inyak ta tai tonglokja alir asem nem obendanger asem agi kumtetba panel kati Brehostibarnü temeden agütsü. Islamist aser pa den külemi aija alirtem ya danga ken o nung nungdaka melira memonui tepuokdak nungi chioktsüla, ta court ajanga obendang agütsü. Southern Sindh province nung aliba sorkari linük nung tematiba court dangi petition ka benoka par telemtetba tanaben reprangshitsü asüngdang, ta Pearl kibong indang okatsür Faisal Siddiqi aser Sindh sorkar indang dang ashi. "Onoki review petition asem tashi benokogo. Aser item petition yagi Sheikh nem temeden agütsüba meyiphidaktsütsü merangtsü aser tasüba temerenshi

agütsüshitsü, ta prosecutor Faiz Shah-i ashi. "Obendang agütsüba nung temolung masüba yong petitioner temi menua melie temzüng, shidak atalokba aser tamendak dak ajemdaker criminal review petition benok, ta petition nung shia lir. Arishi küm 38 tain Pearl ya September 11, 2001 nü United States nung lendong agütsüba sülen Karachi nung Islamist telungpur bushisüngdanga lia pua bener ao. Hopta ishika lir pa tekolak tangzüka yokba video ka temai adok. Supreme Court telemtetba asoshi par tsürapurtemi aoksaba osang ka lemsatsep, koba ajanga Pakistan densema tesem ajungalen kiralongrar nungi timtem ajurua alirtem temolung yirutsüba ka lir, ta US Secretary of State, Antony Blinken-i ashi. Washington-ia Sheikh ya United States nung temerenshi agütsütsü renema liasü, ta Blinken-i ashi. Taoba küm high court ka ajanga Sheikh nem tasüba temerenshi agütsüba ya taküm piyong tepuokdak ayutsü agi melentsü aser pa den külemi aitsür asem nem temeden agüja kuli peria mali, ta shia liasü. Sorkar aser Pearl tsürapur temi iba telemtetba anema nokdak aser Supreme Court dang tasüba temerenshi maneni agütsütsü mepishi, koba Brehostibarnü magizük.

United States nunga COVID-19 tabu tasenba putetogo

Washington, Aenjeti/January 29 (Agencies): Brehostibarnü United States nung coronavirus tabu tasen ka pokteta COVID-19 agi anogoshi nisung 3,000 dak tema asüba linük nung public health tsütsü tetsükdaktsü tasen ka ajurur. Virus tabu tasenba ya mezüng South Africa nung jangjatet aser South Carolina nung nisung ana dak ngutet. Iba tashidak keta alirtem ano alitsü saka mejangjateter dang, ta public health ketdangsurtemi ashi. Iba virus ya temelaba nung prokshia aor aser mozü tem agi mapa tajemba inyaktsü akok, ta parnok ashir. State nung iba tashidak ya region balala nung lanur ana dak jangjatet aser tena ya sendaktepa mali amai sayur. Iba tashidak keta alir nisung anaprong ya tawa oli-oraba kecha mali, ta South Carolina Department of Health and Environmental Control ajanga Brehostibarnü ashi. Ibai tetsüputsü lir, kechiaser state nung iba

tashidak mejangjatetba ano alitsü akok, ta Charleston nung aliba Medical University of South Carolina nung infectious diseases physician, Dr. Krutika Kuppalli-i ashi. Iba virus aruba ya ajanga iba virus tesashi den raraba tatembang kati arutsü ano mapang talangka lir ta sayur, ta South Carolina indang interim public health director Dr. Brannon Traxler-i ashi. COVID-19 mozü tali yangluba mapang lir, saka mozü ya kanga taktet nung angur. Asenok ajaki iba rara nung maneni bendanga agütsüshitsüla aser tang asenok ajak frontline nung lir ta metettsüla. Iba rara nung asenok ajak külem lir, ta pai ashi. Virus tem teti yimya melenshir aser coronavirus tabu ya alima müketa alonger, saka scientist temi tabu tasen asem poktetba atema tali khuret abener, koba züba-züba prokshitsü akok, ta amanger. United Kingdom aser Brazil nung mezüng jangjatetba tabu ya tawa US nunga jangjateta liasü. Iba virus tabu tasenba yagi

US nung tesashiba menatepa aotsü jenjang ka bener arutsü nung, state kar nung governor temi nübur ajak mask agitsü, business tem shibantsü aser danga tenokdangbatem saltsü totuyuba agütsüba anema tashidak wara atema süoki ia agizükba ozüng yanglurtem nokdaker. Arizona, Michigan, Ohio, Maryland, Kentucky aser Indiana densema state kar nungi governor-i emergency tenokdangba agütsüba tashi ajemdaktsütsü asadanger. Wisconsin nung Republican temi amokbanga aliba Assembly nung Democrat telok nungi Governor Tony Evers-i nübur ajunga mask agitsü totuyuba agütsüba agientsü atema vote agiteptsü tebilemba liasü, saka nüburtemi aitsüba mechi ozüng yanglurtemi Brehostibarnü ajungbena vote magitsü lemtet. Pennsylvania nung ozüng yanglurtemi governor indang emergency tashitem aika agientsü atema constitutional amendment ka yanglutsü sentong lir.

Timtem mapang arrsanga inyaktsü atema nungdaker, aser tashi ajemtsüba ajanga tongtipang emergency mapang arrsanga mera magitetsü, ta governor temi ashir. Nebraska nung lokti adenshiba nung tenokdangba agüja aliba agientsü mapang arur, ta health ketdangsurtemi ashir, kong COVID-19 agi meneper mozüki nung anepaluba ajema akumer. Tashidak menatepa aoba ajema akumba state tem nunga tenokdangba salar, saka mongintemi nüburtem dang mask agitsü aser social distancing yimya maneni amshitsü ajungshir. South Carolina nung variant tasenba ya state tzükumlen nisung ka dak aser northeastern kinüklen ka dak ngutet, ta state health agency ajanga ashi. Küm tetenzüklen South Carolina nung Republican Governor Henry McMaster-i tenokdangba timbaka saltsüogo. Variant tasen ngutetba nung ajemdaker McMaster-i tenokdangba

tasen agütsütsü sentong mali, ta odongtar Brian Symmes-i ashi. Tawa jangjatetba mutations nung mozü tabu ana yagi mapa meinyaktsü, saka iba mozü ya agiba ajanga tashidak nungi kumzüktsü akok, ta scientist temi taoba hopta shia liasü. Coronavirus yagi United States nung nisung million aika shirangdaktsüogo aser nisung 430,000 shi takum samatsüogo. Iba tashidak atema mozü agütsü tenzükba nung teyakyak mali saka Tir Joe Biden-i pa office nung mener mezüng anogo 100 tsüngta mozü million 100 agütsütsü nangzüka lir aser US nung anogo ka nung nisung million 1.5 nem mozü agütsütettsü, ta ashir. United States nunga UK nung aliba virus ya nisung 315 dak puteta lir, ta Centers for Disease Control and Prevention ajanga ashi. Item osang ya state 28 nungi aru aser March ita tashinung US tesem ajunga asüngtsü akok, ta health ketdangsurtemi ashir. Iba virus tabu tasenba ya linük 70 shi nung jangjatetogo.

Remembering Late. Temjensoba Mollier on his 3rd Death Anniversary (12.02.1920 to 30.01.2018)



*You built your life on the
solid foundation of God's word
and you fulfilled it everyday.*

*We celebrate your life, your legacy,
your endless pursuit of truth
and the love that you have left
behind.*

*Though you are no longer with us,
the resurrection of Christ comforts
us and gives us hope that there is a
Heaven and that
we will meet you there someday.*



*Children, Grand Children &
Great-Grand Children.*

Sür Küm 1 Ajungba Bilemteter Asür Aomeren



Asüba Anogo : 30th Jan. 2020

Onoki kodanga amatsü makokba temeim oba, nai onok toktsür orr tanü küm ka ajunger. Nai toktsür aoba temoatsü sempet tajung onoki kodanga amatsü makokba tanü bilemteter Tsüngrem tenüngsanga sarasadema amonger.

Asenok ajak künü anogo Kibubar kidang ajuruteptsü yimlar.

- Temeim Kinungtsü, Tanur aser Kinungertem.

KIBONG KÜMER KÜM 50 AJUNGER



Pangertoshi aser Nekenrenla
(30-01-1971 nungi 30-01-2021)

"Tsüngremi nüna nem maneni anema aliba taküm, azükaru aser tepela moajangma."

- Temeim chirnurtem, semchirtem aser sosem-dangsem

OFFICE OF THE YAJANG 'C' BAPTIST CHURCH

P.O. MANGKOLEMBA, B.P.O. LONGCHEM
Dist : MOKOKCHUNG : NAGALAND.

AYONGZÜKER

YAJANG 'C' Anükapang aser Tetsütamu den Telongjem Sentong ka 5 - 7th Feb' 2021 Yajang 'C' Baptist Arogoi ayonger.

Iba Telongjem Sentong nung Anükapang aser Tetsütamu ajak atentsü ayongzüker.

Sd/-
Rev. T. Wapang Jamir
Pastor
Yajang 'C' Baptist Arogo.

Sd/-
S. Senti Aier
Secretary
Yajang 'C' Baptist Arogo.

Wokha DPDB senden amen

Wokha, Aenjeti/January 29, 2021 (TYO): Ralan Sub-Division Forest, Veterinary & Animal Husbandry, Water Resources, kübok Governors camp, Rural Development, Tourism, Liphayan nung Doyang apu ano merenemba dak sendakba nung debilemstü adokba Wokha District Planning & Development Board-i lemsatop. Doyang ayong ajanga teyangludak aliba apu ya Nagaland Foot-Hill Road (Nagaland Express Highway) kübok aiter aser iba apu ya renemer sülen, Nagaland State rangben atema tongtibang akümtsü. Brehostibarnü (28.01.2021) Liphayan

Advisor for Horticulture and Border Affairs, Mhathung Yanthan-i, Liphayan nung iba senden ayongba tasa ya, Department balala dang iba tesem indang jung junga angatetdaksütsü aser iba tesem nung alirtem timtemba den külemi terenlok maparen peria manguba timtem balala metetdaksütsü nükjidong yur agir, ta ashi.
(Maneni tapak 10 nung...)

Mon nung National Girl Child Day mungogo

Mon, Aenjeti/January 29, 2021 (TYO): Mon District Administration den DLCW-MSK & Sakhi-OSC longjemer National Girl Child Day (24th January) anogomung nüngtem nung hopta ka - January 21 nungi tenzüka January 26, 2021 tashi sentong ayonga agiogo.

Hopta ka piyong iba sentong ayonga agiba mapang, District tesem ajunga nung sentong aser tetoktepba balala achaayanga agiogo.

January 21 nü tetsü (Grandmother) aser semchir (granddaughter) selfie competition agi. Aboi nung School 8 nungi züngsem 10 -10 densema Girl Club tem tentet aser korang den badges tem lema agütsü.

January 22 nü "Beti Bachao Beti Padhao" onük nung ajemdaker Online slogan competition agi. Aboi nung sü atakba aser design training

January 23 nü Phomching HQ nung POSCO Act, Menstrual Hygiene, Good Touch Bad Touch aser women centric nung Ballika Manch sentong agi. Tainlonglong tetsürtem nem Stationery kits lema agütsü.

January 24 nü DLCW - MSK Sakhi- One Stop Centre aser Santham Ward Mon Town indang lanurtem den District Administration longjemer tetsür tanur tenüng nung süngdong atemba sentong ka ayongzüker. Item süngdong ya DFO Mon-i agütsü.

January 25 nü BBBP Mon Block Task Force den DLCW-MSK aser Sakhi- OSC longjemer tangar memenep/ matamabensar tanurtem jangjatet aser parnok nem tenüngsang agütsü.

January 26 nü Mon Town nung Republic Day agiba mapang Minister PWD Mechanical & Housing Tongpang Ozukum-i Women Frontline Workers nem tenüngsang agütsü.

Aboi nung 72buba Republic Day sentong agiba mapang, BBBP Girls Club-i Linük Naklo ken aten.

Anjangyan HQ nung tetsü aser tetsür tanurtem atema angati medical camp ka ayongzüker, kong tajangzüker angutsüpur 100 dak tema nem tajangzüker agütsü. Tekoktepba balala nung takok anurtem nem Republic Day anogo nung sempet agütsüogo, ta sangdong ajanga metetdaksü.

Asür Temjen Toy nem akhüm agüja Noklak nung sentong agi

Noklak, Aenjeti/January 29, 2021 (TYO): Hokolbarnü (29.01.2021) Longdon Baptist Church, Noklak nung asür Temjen Toy, Chief Secretary of Nagaland nem akhüm agüja sentong ka agiogo.

Iba sentong nung Deputy Commissioner, Noklak, Reny Wilfred, IAS-i o tatsüka jembir sülen, sentong nung adener

ajaki minute ka süngjema mokremer asür nem akhüm agütsü.

President, Khamniungan Tribal Council, M.Thangou-ia asür Temjen Toy asüba osang angazüka mangyim tejashi lemsatopogo.

Iba sentong nung EAC Noklak, Yithachu Thur menden liasü aser District Planning

Officer, Noklak, Meren Jamir-ken ka aten. Sentong tenzüka Pastor, Longdon Baptist Church Rev. B.Chillia-i sarasadem.

Asür Temjen Toy nem akhüm agütsüba sentong nung District Administration, departmental ketdangsurtem, tentet aser Arogo balala aruagi denogo, ta sangdong ajanga metetdaksü.

